

COVID-19: 691 kes baharu dilaporkan, majoriti di Penjara Alor Setar
Astro Awani
06 Oktober 2020
Hilmi Malik

KUALA LUMPUR: Kementerian Kesihatan Malaysia (KKM) memaklumkan sebanyak 691 kes baharu penularan jangkitan COVID-19 dilaporkan dalam tempoh 24 jam lalu.

Menurut Ketua Pengarah Kesihatan, Tan Sri Dr Noor Hisham Abdullah, dalam tempoh yang sama, Kedah merupakan negeri yang mencatatkan jangkitan tertinggi iaitu sebanyak 397 kes.

Kata beliau, daripada 397 kes di Kedah, sebanyak 394 jangkitan merupakan penularan di Kluster Tembok Penjara Alor Setar.

“Sebanyak 394 kes telah dikesan daripada Kluster Tembok melibatkan Penjara di Kedah bersamaan 57 peratus dari jumlah keseluruhan kes.

“Jumlah kes aktif dengan kebolehjangkitan COVID-19 adalah sebanyak 2,936 kes dan mereka telah diasingkan untuk rawatan,” katanya dalam sidang media menerusi laman Facebook Kementerian Kesihatan Malaysia (KKM) pada Selasa.

Sementara itu, beliau berkata, Sabah pula mencatat negeri kedua angka tertinggi jangkitan untuk hari ini dengan 219 kes dilaporkan.

Dr Noor Hisham berkata, daripada 691 jangkitan baharu dalam negara, 688 merupakan kes penularan tempatan menjadikan jumlah keseluruhan kes positif COVID-19 di Malaysia sebanyak 13,504 kes.

Pada Isnin, Kementerian Kesihatan (KKM) melaporkan Malaysia mencatatkan 432 kes positif COVID-19.

Setakat ini terdapat sebanyak 87 kes yang dilaporkan telah pulih menjadikan jumlah kumulatif kes pulih dari jangkitan COVID-19 di Malaysia sebanyak 10,427 kes.

Bagaimanapun, setakat hari ini terdapat empat kes kematian baharu dilaporkan dan salah seorang daripadanya merupakan seorang bayi perempuan warga tempatan berumur setahun yang disahkan positif pada 5 Oktober sebelum disahkan meninggal dunia pada jam 4.25 petang.

**© 2020 Astro Awani Network Sdn. Bhd.
(535275-D) All Rights Reserved.**

Source: <https://www.astroawani.com/berita-malaysia/covid19-691-kes-baharu-dilaporkan-majoriti-di-penjara-alor-setar-262417>